

## **Historia dalla pleiv Castrisch/Riein/Sevgein**

La pleiv Castrisch/Riein/Sevgein secumpona dallas pleivs, pli baul autonomas, Castrisch (cun diaspora) e Riein. Omisduas pleivs ein seligiadas cun la reformaziun suenter ils artechels da Glion (1526).

La baselgia da Castrisch (Kästris) vegn numnada per l'emprema ga egl urbari dils beins imperials da 825, lura puspei egl urbari carolingic da 831 e quei sco „Ecclesiae Sancti Georgii in Kestris“; ei setractava dad ina pintga caplutta cun ina nav da 4,70 x 9,50 m e d'ina absida en fuorma da fier cavagl. Entuorn 1150 ei il clutger roman vegnius baghegius vidlunder; entuorn 1340 ei Castrisch ina atgna pleiv. Egl onn 1470 succeda ina cumpletaziun en stil gotic. Cun la conversiun dils da Castrisch tier la reformaziun ein ils da Sevgein, ch'ei restai tier la veglia cardientscha, sesligiai dalla pleiv materna da Castrisch.

La baselgia s. Nazari da Riein vegn numnada per l'emprema ga egl urbari carolingic da 831 sco atgna baselgia roiala; igl onn 960 ei quella vegnida transferida agl uestg Hartbert da Cuera. Aunc avon igl onn 1000 ei il clutger carolingic vegnius baghegius; dapi quei temps s'udeva Riein tier la gronda pleiv da Sagogn. Igl onn 1487 ei la pleiv Riein daventada ina pleiv autonoma che ei vegnida suttamessa sco filiala alla baselgia da s. Martin a Pitasch. La pleiv da Riein ei seconvertida sco ina dallas empremas vischnaucas dalla Surselva tier la reformaziun.

Dapi il temps dalla reformaziun ei la matricula dils plevons cumpleta. Dapi 1872 formavan Riein, Pitasch e Duin ina communitad da pastoraziun, Castrisch cun Glion dapi 1910. Dapi igl onn 1942 fuorman Castrisch e Riein ina communitad da pastoraziun. Igl empren plevon ei stau ser dr. Peter Dalbert. Igl onn 2005 ein las pleivs autonomas sefusiunadas alla pleiv Castrisch/Riein/Sevgein.